

CHRISTA HOUBUNG KHANTOUNA

Ama thu chu kahillu ahi, mijouse hi aphot chamkima Pathen anga kadinsah theina dinguva kachihna jouseuva amitakip kapholeuva Ami jouse kahilu ahi (Col 2:28)

By. Rev. Hemkhomang Haokip, B.D

First Edition – 2012

Phondohna

Hiche lekhabu neucha “Christa houbung khantou na” Kiti kahin sutlona ajeh chu, Houbung khantouna kiti hi Bible dungjuia itobang chu ham tihi ihetdoh theina diuva kahinsut ahije. Ajeh chu houbung khantou kitihi ngaidan atamin ahi. Houbung member tamjeh le sumle pai muna tamjeh a houbung khantouna kiti jonghi khantounapen a ihetnu chu ahi. Hinla Bible in Christa houbung dihtah atipen hi lhagaova Penthahna dihtah neiho ol-olla hung khang dingho chu asehi ahi. Houbung chu lenhen thupi lneh jongleh vangam lutding umlou Pengthahlou jeng kiloikhomna chu khangtou kitilou ding ahi.

Ahin hiche lekhabu hi pohnat jala kahin sutdoh vangin atadohna ding sumle pai kaneilou jeh a Pathen henga kanataona Pathen in eisanpeh a sopipa ----- lungthima thu ahinseia tua lekhabu tadoh a uma chuleh gamtina hopdoha aumtahjeh hi ama chung a kipana seijoulou kahin phongin Pathen kathangvah in ahi.

Tuhin alekhabu hi sutdoh tadoh in umjeng tajongleh nangin nachoh a nasim louleh nang dia phachom louding ahin, hijeh hin choa sim jouse Pathen in phatthei naboh taohen, Amen.

Author.

A. Houbung kimin phahpatna :

1. **Houbung kiti min** : Houbung kiti min hi thulhun lui bu 39 sungah akimu khapon, chuleh akimin phah khapon ahi. Pathen injong athemgaoho koma jong ana seipeh khapoi. Hijeh achu Paul in akhang akhanga ana ki-im thuguh tua eiho amithengho henga aphondoh ahitai anati chu ahi (Col 1:26).

Ahin thulhun thah lekhabu Bible bu 27 sunga Mathew 16-18 sunga hin, Pakai Jesu amatah in ka –houbung, ka-phudoh ding ahi tia ahin phondoh akona houbung ahilouleh koudoh/kouchom kiti thucheng hi hung kiphapoh panbep ahije.

Leiset chung a Pakai Jesu alenlaia ana kimangpen pao chu Greek pao anahin, hiche Greek Paova chun Jesun “Ekklesia” ti thucheng hi ana mangchan ahi. “Ekklesia” chu “EK” hin “Polama” ti thucheng akoudoh in “Kaleo” hin koudoh ti thucheng akoudoh in ahi. Houbung kiti thucheng hi Bible ah akimupon ahi. Houbung iti tiuhi koudoh ahilouleh konchom joh itidiu ahije.

Ajeh chu mihem eiho michonse muthim lah a analengho chu Pathen in achapa thisan achu ichonsetnahou asopthenga muthima kona vah eilhutnu ahitahjeh achu “Koudoh” “Kouchom” ihuiva ahitai tina ahije (Jn 17:14-19; 15:14-17; ICor 1:2).

2. **Houbung hung kiphudoh patna:** Pakai Jesu amatah in ka- houbung ahilouleh ka-kouchom kaphudoh ding tia ana phondoh jeng vang chun, houbung atahbeh chu Penticost nikhoa lhagao theng hung kum nia chu hung kiphutdoh panbep anahije (Acts . 2).

Houbung ahilouleh kouchom hi Christa thisan le lhagaova kiphutdoh ahijeh a Christa kouchom kiti ahije. Christa kouchom hi Christan athisana achohdoh aphudoh ahijeh a Christa houbung tia kihe ahi. Mihem chihle thepna thahatnaa kiphutdoh ahipon, sumle pai thahatna ajong kiphutdoh ahipoi. Chutileh mihem in kisonna anei ding ahi.

3. **Christa houbung kichaina ding phat :** Penticost nikhoa Jerusalem a Pakai jin ana phudoh ahoubung ahilouleh a kouchom chu Rapture kiti leisetna kona Christan amithengte ahung puitou nikho tengleh kichai ding ahitai. Chuteng chuleh Pakaijin akouchom (houbung) mithengho (amou) chu akoma atousah a leisetna ana thoh gentheinaho jousea kona a-olsah ding ahitai.
 4. **Bible sunga mihem 3ho din mun :** Bible sunga hin leiset chung a mihem dinmun 3bou seh akimun, amaho cheng 3hitoh Pathen in leiset semtila pat leiset kichaini geia atoh khom jing ding ahi. Amaho chu : (Gentile, Judah chuleh houbung ahivu).
 - a. **Gentile :** Adama patna hung pengdoh mihem jouse hi Gentile tin akihen ahi. Gentile tihin Pathen hephalouho chuleh Pathen hetphah louho, Pathen akona gamlatah a umho tina ahi. Ajeh chu Adam chu Pathen huon theng Eden akonle Pathen angsunga kona potdoh ahitah jeh ahi.
 - b. **Judah :** Gentileho lah akona Pathen in michi theng khat semdohna ding ahi ana lhendoh Abrahamana kona chu namtheng khat ana semdoh chu Judah namhi anahije. Hijeh achu hiche Judah nam lhente hitoh kum phabep ahintoh khom sunghin Pathen ana lunglhaisah pouvin ahi. Judahte hin kum tampi a Messiah uh hung ding ana kineppi jingu Messiah chu ahung phat chun, ana deipouvin ana sangtapouvin ahi. Hijeh chun Jehovah Pathen jong chun ami Israelte/Judahten anasan tahloujeh un aman jong amite anungsuntan ahi (Jn 1:11).
 - c. **Houbung :** Jehovah Messiah chu amite ding ahi hung ahivanga amiten ana santah loujeh un, ama anatahsana anasanghoa kon chun Christan jong ahoubung ahin semdohtan ahi (Jn 1:12). Houbung hi mihem phudoh ahipon, Christa Cross chung a hung longdoh athisana chu ahin semdoh ahibouve. Hiche athisana aphudoh ahoubung hitoh tua vannoa Christan na atohkhom pettah ahi.
 5. **Houbung khantou :** Christa thisana kiphutdoh houbung hi ahing ahijeh achu khangtou theia kemsuh theia chuleh thithehi ahi. Ijeh inem itileh hichu ahing theiho umje ahi. Christa houbung ahilouleh kouchom hi alamdoltah a Pathen thuhing a phatecha akipuia lhagao anle twia akivah jinga ahileh pilhinga ga tampi asodohji ahi (IPet 2:2). Hijeh achu Christa houbung khantou ding thudolho hi anoilama ihung kihil suhpeh diu ahi.
- B. **Christa houbung alima kiseinaho :** Apostle Paul chun Christa houbung hi limchom chomle hina chom chom neia aseina anoia hin akhantou thudoltoh seitha suhpeh uhite.
1. Christa tipum ahi (Body of Christa) ICor 12:27. ---->
 2. Christa mou ahi (Bride of Christ) Rev. 21:2,9. ----->
 3. Pathen Inn (Temple of God) ICor 6:19. --->
 4. Pathen kelngoihon (Flock of God) Acts 20:28.----->
 5. Pathen huon (Garden of God) ICor 3:9.----->

6. Pathen Insung (Family of God) Eph 3:15.----->

C. **Christa houbung alima kiseinaho banneia hilchetna:**

1. **Christa tipum (Body of Christ)** : Apostle Paul chun houbung hi Christa tipum toh atekah in ahi (ICor 12:27). Christa tipum (Body of Christa) ti thucheng hi Paul in houbung thu aseina jousea amanchah nopen thucheng ahijingin ahi. Apostle Paul in Christa hi tahsa luchang hichu houbung ahi ati. Ajeh chu Pathenin Christa hi imajouse luchanga atun, asem ahitai (Eph 1;12). Ijeh inem itileh eiho tahsanho hi Christa tipum a houbung tibah ihicheh un, imalam jousea ama achu ikhantou cheh diu ahi (Eph 4:15).

Christa tipum ahoubunga chu tahsanho jouse hi khatcheh chu khat tibah ihisoh keyiu ahi (Rom 12:5; ICor. 12:12-31). Christa houbung lima kiseinaho akhantou ding thudolla Paul in ahilchetnaho anoia hin vesuhsuh uHITE.

a). **Christa chu mun sangpen ipoh tenguleh khantouna hung umji ahi:** Tahsanho jousen Christa chu ijakaia mun sangpen ipoh tenguleh khantouna hung umji ahi. Bible in amasatah in agamle achonphatna holmasauvin chutengle adangse hung kipehbe ding nahiuve ati (Mth 6:33). Ajeh chu khantouna kitih hinna neiho umdan ahi. Mi hihen, ganchaho hijongleh thingphung hihen gophung hijongleh hinna aneih uva khangtouna theiah ahivue. Khantouna kitih i Pathenin thil hingtheiho jouse chinga anakoi ahije. Ajeh chu:

- i. Christan thiljouse ama dinga asem ahi (Col 1:16)
- ii. Christa achu thiljouse ana umah ahitai (Col 1:17).
- iii. Christa chun thiljouse ana vettup ahi (Col 1:17).
- iv. Christa chun thiljouse ana gottotaha ahi (Col 1:18).

Christa houbung chu Christa toh akijop mat jinga ahileh ahing ahin, ahing ahijeh achu khangtouna teiding ahi. Hije achu houbung chu Christa toh akijop matjing louva ahileh achanga chu gatheilou ahin achanga chu athi ahi (IPet 2;4,5 ; Jn 15:6). Houbung tichu Christa toh akijop louva, lhagaova ahinlouva ahileh ahing min pua athisa kiti chu hiding ahi (Rev 3:1). Tulaihin chutobang ahing min pua athisa houbung atamin ahi.

Christa houbung kiti tahsanho hin apakai ahuhhingpa thupoh Bible sanga kisunho niellouva ajui jinga ahileh tahsalam hihen lhagaova lam hijongleh khantouna umjing ahi (Jn 15:5). Corinth houbung memberho chun Pakai Jesu sanga mihem lamkaiho anajui khah jeh un houbung sungah kinie baotam anasoh jingin khantou tahsangin ana boilo taovin ahi (ICor 1:10-17).

Christa houbung chun leisetna muthei lamkai kelngoipu khat aneibang uva, mutheilou kelngoipu lamkai khat jong aneijingu angaijin ahi. Kelngoipu jong chun kelngoi chingpipa hoitah a ajuijing ding angaije. Kelngoiho jong chun kelngoipu nung phatecha ajui jingu angaije. Pathen thuseipa khat chun, hitin anaseijin, keiman Pakai kajui laisen keima neijui jingun ahin keiman Pakai chu kajui loutengleh nanghon Pakai nung kijuitaovin ati. Kelngoipu khat chun kelngoi chingpipa hoitah a ajui laisea chu kelngoihon chun kelngoipu chu lhasolouva ajui jing diu ahi.

Tahsa pum (body) dinga luchang hi ijakaia amapui, alamkai, akaihuoile atahsa pumpi kihinsona ahibanga, tahsanho dinga aluchang Christa hi ijakaia amapui akihinsona ahi. Ajeh chu luchang hi tahsa pumpi thuneina lhingset vaipoh vaihopna jouse um ahi.

Luchang umlouva tahsa pum hi mohseh panna bei ahibanga Christa panglouva houbung chu mohseh athisa ahi.

b). Tipuma tibahho chun kitohtah a atohkhom tenguleh khantouna umji ahi: Tipuma hi tibahho tampi, khut keng, luchanga, mit nah bil, adang dangho aumin ahi. Hiho chun ahina dolcheh a kitohtah a na ahintoh tenguleh tahsa pumpia chu thahatna khantouna hung umji ahi. Ahin tahsa tibahho lah achu ana damlou ahatmojep ahung umtengleh khantouna umji theilouva tohdoh boldoh umtheije lou ahitai. Hitobanga chu Christa houbung sunga jong chu memberho lah a kilung khatlouna kinahna boinaho ahung umtengleh Christa houbung chu lhagao lama dammojia machal theilou khangtou theijilou ahi. Hiteng chuleh houbung sunga lamkai mopohon lhagao lama suhdam dinghi mopohna a alahdiu ahi. Houbung sung kilangkhen, kibungkhen, kiseisetto kimudatona ahung umtengleh houbung chu adammo ahijitan khantouna chu adaljitan akisuhdam vahlouleh houbung chu thiding mang ding ahitai.

Christa houbung sung chu lamkaihon asuhdam selluva, talent neiho thepna chihnaho chu hoitah a amanuva houbung chu akhantousah diu ahi (1Cor. 12:3-5). Hijeh achu tipuma tibahho chun kikhen kangloughella phatseh a atohkhom tengleh akhantousahji banga chu – houbung sunga memberho kah a boinaho ahilouleh chonsetna chu asuhbei tenguleh houbung chu khangtoujing ding ahije (1Cor 12:25). Lekhabu sun minthang khat saucy chun, luchang langa ineulut houva kona tibahhon tipuma thale jung ahin jedohjia chua thahatna ahin neidohjia chua na atohgotho ahin tohdohji ahi ati. Lhagao thilpeh chang lhagao mihoa kona chu Christa houbung hi tahsa lamle Lhagao lama hung khangtouji ahiye (Col 2:19; Eph 14:15,16).

2. Christa mou (Bride of Christ) : Vantil khat chun John hengah, hungin kelngoinou jiding mounu chu vetsah inge “ati (Rev. 21:9). Apostle Paul chun houbung mithengte thudol aseina ah, “Ajeh chu Christa henga nungah thengsel banga kapehdoh theina diuva jipa khatna dinga katuhhol nahiuve” ati (2Cor. 11:2).

a. Christa ngailutna ihetdoh tenguleh khantouna hung umding ahi: Apostle Paul chun Pathen chu ngailut ahijeh in Christa Pathen neiho chun ngailutna chu aneiju ahitai ati (1 Jn 4:8). Lekhabu sunpa khatma chun, “Mi khat in eilungsetne ti ahetdoh kahsen ama chun ilungset theipoi” ati. Christan ahoubung angailut vetsahna a cross a ahung thina jeh achu eihon jong Christa chu ingailut theiju ahi (1Jn 4:9). Pakai Jesun, “Keima neingailut uleh kathupehho nanit dingu ahi” ati (Jn 15:10). Christa ngailutna panglouvin koiman hinkhotheng amang joupou. Ngailutna in chonset tampi akhui/aselmangjie atibang chun Christa ngailutna panglouvin koiman Christa jallin hinkhotheng amang jouji pouve (IPet 4:8).

b. Christa ngailutna a ium tenguleh khantouna umji ahi: Apostle John chun, “Aman eingailut masetjeh uva eihon ama ingailutnu ahi” ati (1Jn 4:19). Christa chun ahoubung (aji) chu imalam jousea athunoia kitulut dinga adeina banga umdinga angeh ahi (Eph 5:22). Christa deina banga ahoubung aumlaisea chu Christa toh ijakaia kikap ahijeh a tahsanhon lhahsantih aneilouhel ding ahi. Ahin Christa nungjui hipuma nunglam vea eima deidan a hinkho man jing chu Christa deidan ahigon, chujeh achu Christa vangbohna jong changlou ding ahi. Christa tahsan houbungchu chu Christa deidana chon seingai chate ahui angaije. Nehle don hihen sille chen

hihen tohle tham thua hijongleh Christa tahsanho chu Christa deidana chonte ahiu angaije. Ajeh chu Christa a ahitahjeh uva chu ama deidan hitalouva aneipa athisana chodohpa thu thua aumu angaijin ahi. Christa tahngeijin jong apa-Pathen henga ataova chu keima lunggot bang hilouvin nangma lunggotjoh hijohen atibang chu hiding ahi. Ijeh inem itileh tahsanho chu Christan athisana alhatdoh achohdoh ahitahjeh achu amaa hitalouva Christaa ahitahjeh achu Christa dinga ahin ngai ahitai. Ihinleh Christaa dinga henge thijongleh Christa dinga thi ihidiu ahitai (Rom 14:8).

Christa thisana kisopthenga, Christa a hiho chu Christa thuhila hinguva christa thuhil achu kipuidih jingdiu chuleh Christa thuhila chu jungkho diu ahi (Col 2:7). Ngailutna achu Christa na atohdiu ahi. Ngailutna panglouvin koiman Pakai na chu atong theipoi. Hijeh achu Pakai amatah in keiman nangho kangailut bangu hin khatle khat kingailuto cheh un ati (Jn 13:34).

3. **Pathen Inn ahi (Temple of God)**: Apostle Paul in itahsau hi isunguva cheng Pathen lhagao inn ahi ati (2Cor 5:1). Atahbeh in itahsauhi ilhagaovu chenna inn ahimongin ahi (ICor 3:16). Tahsa anle tui ineulut ivallut uva kona tipum hin khantouna aneiji banga, Bible simle taona Pathen vahchoila sahjing chuleh Pathen thu seiphongle ngailhah jinga kona tahsanho hin lhagaova khantouna ineijiu ahi (Col 2:7). Tahsa miho chu tahsalam thilho in akivah jiuvin, hinla lhagao miho vang lhagao an in akivah jiuve. Chuleh lhagao miho chun lhagao thilpeh ichan houhi ahina banga Pathen lunglhaina a iman jing theiuva ahileh lhagaova khantouna umji ahi.

a). **Inn kisa achu Christa achen tengleh khantouna umji ahi**: Inn kisa chu ahoina ding, aloupina ding jenga kisa ahipon, mihem chenna dinga kisa ahi. Hijeh achu Paulin tahsanho tahsa pumhi Pathen lhagao theng chenna ahijeh a thengtah a vopje kisinsah ngai ahi anati (ICor. 3:17; 6:19-20). Hijeh achu tahsanhon katahsa pum hi Pathen lhagao theng chenna inn ahi ti ihetnuva Pathen inn chu thengtah a vopjingle venbitje ikisin diu ahi. Inn kisa achu Christa achen louleh setan chenna inn chu hitei ding ahi. Itahsa hi Christa chenna inn hisah a, eima hi avesui choukidar banga ikigel diu ahi. Natahsa chu nangman navenbit joulouleh avengbit jouding umlou ahi.

Tahsanho sunga chu Christa cheng ahitahleh hiche insunga chu Christa ainn neipa chun thu aneitei ding, chutia ama thuneina insunga chu chamle monna kipana umtei ding ahi. Christa a penthahna nei tahsanho atamjoho hin Pathen lhagao chenna atahsau chu adei dandan in amangjiuvin nitin in Christa chu alung phatmosah jiuvin ahi. Hijeh achu alhagao hinkhou gentheijia Pathen lhagao chu asunguva kapkap jah ahi. Pathen thuman hi lhagaole tahsaa phatthei buoh channa jong ahi.

Hetding khat aume. Nasunga chu Christa lhagao cheng mong hinam? Kikhollin ajole Christa neia kigella aneilou khat anahikhale chun da umtah hikhannate. Phatseh in kivechil jingin thilkhohpen in gellin.

b). **Inn sapan dihtah le hoitah a asah tengleh detna lhou ahi**: Inn khat kisahdohna dinga chu insa dingpa chu, inn sathempa (Enginur) chun atoh dingdan thupeh apehji mong ahi. Ahin inn sapa chun inn sathempa (Engineer thupeh banga bollouva, sum

tam suhlt louna dinga thilho chu aman lhomho amana, chingtheitah a abollouleh aphot lhinglouva inn chu hiujin amutlhuh theia ahiloulhe chimlha jengthei ahi.

Hetding khat kit chu, khopi lenhoa inn kisaho khu inn sathemho (Engineer) thulouva kisa umtheilou ahin chuleh amaho thupeh banga kisalou chu kilalou ahi. Amaho chun inn kisah ding danho chu thu apehjuva hiche dungjuia chu insah apanjiu ahi. Noah jong chu Pathen in thupeh afeh banga asah jeh a akong chu twichunga kitol jaljeng ahi. Athing jong Pathen in adeilhenpeh gophel thing ahin, asandanle, aletdan, adung, avai, atongjat, Pathen in afeh bangin abollin, chuleh ain danho umding danho jong Pathen injong Noah kongsui chungu chun ana lunglhaijin ahi. Noah chun Pathen thupeh banga bollouvin ama deidan in, khiengthing phajonte tin anasuileh nisan hinkaleh pohkhintin akhikah ah twi lut intin lhalhum ding, chutia chu asunga umho ganchaho le mihemho chu thigam diu ahitai. Hiejeh achu Pathen in eihoa dia imajouse aphajo ahethajeh a apha dinga aseiho hi iboljeng dingu ahije.

Pakai Jesu chun, "Nangho kathua naum uva, kathu nanghoa aumleh nagotchun thumun kibolpeh ding nahiuve ati (Jn 15:7). Eihon eiho hetna khatna Pathen puitei igotjiuhi ilosapna ahijingin ahi. Bible in amasan ama gamle achonphatna holmasauvin chutengleh adangho chu hin kipehbe ding ahi ati (Mth 6:33). Inn sathempa thupeh dung juia neldi hijatle cement hijat halding, thehijol aneu hilaia manding, alenho hijat hilaia man ding, thing hitobang manding atibanga iboltenguleh inn kisa chu detna lhouva, hoia chutia chu asunga chu lungmonga ikhosah theiju ahi. Chutia chu huipi, gopile adaple asatteng jongleh olmolouva lungmonga ium theijiu ahi.

Apostle Paul chun themgaoho le solchahho songset chungu nangho kisadoh nahiuve ati (Eph 2:20). Chuleh inn kisa chengse chu, amatoh kijop cheh ahin, hou intheng hidinga pakaia khangtounahiu ahi ati (Eph 2:21). Paul chun insathemtah (master builder) banga abul kaphudoh ahitai, aban chu nanghon chingtheitah in kijoptounahiuve ati (1Cor 3:10). Abul chu Christa le athuhil a hung kipan ahi.

c. Inthil hoitah le phatahho akiman tengleh inhoi inpha kisadohji ahi: Inhoile inpha sahdohna dingin inthil hoile inthil lhouho mantamho manchah angaije. Ajeh chu inthil hoile alhouho chu nget injong aneh theilou, meijin jong akah vam theilou ahi.

Christa houbung semdohna dinga inn thilhoi mandingho chu Pathen thule lhagaova pengthah, apenthah jouva twilut, Pakai jaan an neho, hinkho theng mangho thutah a dingdetho chu ahieuve. Amaho hi nget in aneh theilou inthil hoilho chu ahieuve. Ajeh chu pengthah louho chu Pakai houvin sahna dinga manchah thei inthilho chu ahi pouve.

Inbuldet (foundation) chu Christa chu ahin, hiche inbuldet Christa chungu kisadohho mipengthahho chu Pakai houin sahna dinga manchah pha inthil hoile lhouho chu ahieuve. Inhoile inpha indet sahna dingin nget in anetheile meijin akahvam theiho thingle chang polle bia kisaho akimang theipouve. Check ahilouleh songle cement thihho ki halla kisaho chu meijin akavam theipon nget injong anetheipouve. Ajeh chu hinna neilouho chu hinna neiho panmun ah akimangcha

theipouvin ahi (ICor 3:10-11). Hiche pengthah memberho Pakai houin houbung sahdohna dinga kimang theiho chu Bible in songhing atiho chu ahiuve (IPet 2:5).

Christa houin houbung dihtah semdohna dingin tahsan kicheh nei lhagao mi, leiset thuho sanga van thule lhagao thuho gelsangjoho chu hiding ahiuve. Ajeh chu hitiho bou chun vanlam dinga tohsa asodoh jiu ahiye. Nahin danle nahinkho mandanho chun Chrissta inn nalhagao inn asah ahi (Acts 4:11).